



Cuira, ils 13 da settember 2022

Communicaziun a las medias

Project «Rumantsch en la diaspora» da la Lia Rumantscha Fundaziun da cuminanzas rumantschas en 5 citads da la Svizra tudestga

En il rom dal project «Rumantsch en la diaspora» da la Lia Rumantscha èn vegnidas fundadas tschintg cuminanzas rumantschas en la Svizra tudestga. La finamira dal project è d'implementar ina purschida persistente per famiglias, uffants e giuvenils en la diaspora rumantscha. L'emprima cuminanza che sa preschenta cun in'occurrenza da partenza ils 24-09-2022 è la Cultura Rumantscha Lucerna. Ella preschenta l'emprima giada publicamain sias purschidas e sias ideas.

Radund in terz da las Rumantschas e dals Rumantschs abitescha en la diaspora rumantscha, vul dir ordaifer il territori linguistic rumantsch. Uschia ha il Cussegl federal fixà en la missiva da cultura per ils onns 2021 fin 2024 la prioritad da promover la lingua e cultura rumantscha en la diaspora rumantscha. La finamira è da metter a disposiziun en l'avegnir purschidas da furmaziun rumantschas ad uffants e giuvenils en la diaspora e da pussibilitar al conturn dals uffants e giuvenils da duvrar la lingua en il mintgadi.

Sa fundond sin questa situaziun ha la Lia Rumantscha instradà la fin da l'onn 2021 il project «Rumantsch en la diaspora» che vegn sustegnì da l'Uffizi federal da cultura cun ina contribuziun da 50'000 francs. Cun quest project vul la Lia Rumantscha cuntanscher las Rumantschas ed ils Rumantschs en la diaspora rumantscha e sclerir ils giavischs e basegns da famiglias, uffants e giuvenils. La finamira finala dal project è da metter il fundament per ina collavuraziun instituzionalisada cun persunas en la diaspora, fundar cuminanzas rumantschas localas e pudair implementar tras quai ina purschida persistente per famiglias, uffants e giuvenils en la diaspora rumantscha.

Duas fasas da project

La Lia Rumantscha è en in'emprima fasa vegnida en contact cun persunas interessadas ch'èn stadas prontas da furmar cuminanzas localas e sviluppar purschidas concretas per la gruppa en mira. Quest pass è succedi tranter il schaner 2022 ed il zercladur 2022, cun il resultat da tschintg fundaziuns da cuminanzas rumantschas. Las novas cuminanzas sa chattan a Basilea, Berna, Lucerna, Son Gagl/Appenzell e Winterthur. En ina segunda fasa organiseschan las cuminanzas en collavuraziun cun la Lia Rumantscha quest atun arranschaments che pussibiliteschan l'inscunter cun las famiglias interessadas, promovon activamain la discussiun davart lur basegns ed augmentan la visibilitad da purschidas da furmaziun existentas. Sco emprim arranchament han tut las cuminanzas rumantschas previs in'occurrenza da partenza che vegn ad avair lieu independentamain ina da l'autra la fin da quest onn ubain l'entschatta da l'onn proxim.



Lia Rumantscha

Cuminanza Cultura Rumantscha Lucerna sco battavia

L'entschatta fa la cuminanza Cultura Rumantscha Lucerna. Sia occurrenza da partenza serva a la preschentaziun da las purschidas elavuradas e vul intimar ulteriuras persunas da sa participar a la cuminanza ed a las purschidas. Ultra da la preschentaziun da la spierta da la Cultura Rumantscha Lucerna datti in pled da la Lia Rumantscha, musica live da *ladunna* ed in apero.

L'occurrenza d'entrada libra ha lieu sonda, ils 24-09-2022 a las 16.30 en il Kaffeekranz, Claridenstrasse 4, a Lucerna. S'annunziar pon ins via mail@ucrl.ch.